

Efesus

Paulus arye, Efesus mutuku diba tenelamik ninye ati, sekeibuk yupu

Abuku sekuk deiyoknye bira, Paulus ulamuk. Abuku ara, Efesus mutuku ninye ulamikce, dib tenelamik ninye ati, Paulus arye, asurat sekuka dopdeibuk.

Efesus mutuku ara, weik asik dolamik mutuku wamuk. Ninye fia weik dana-dana tam nirya arye, 'Bon ning dekelbinamak' tenen, Efesus mutuku balamikce deklamik. Paulus arye, kiting tamun winilye deice arye, amutuku noutamak ulamukce peterelamak. Abuku noutamak ara, Paulus arye, 'Ayupu ara, weik mambul' tenen, sekdeipsuk ning ara, ani. Tonok ning ara, Allah arye, nun nirya ati minop talak teneamsuk ning ap, 'Wininamak' tenen, nyalilamsuk ning ap, lyepsiliba aminyan talak ara nirya, el si erebuka kinamak ning ap, aning-aning nirya dobuka, Kristus el amutam deipnamle ning ap, Allah el kanye aryuk bico teneamsukce, kanye talima dukdongopsukba, el ap, yuk dib tenen ninye ap, teleb kibuka neika unamak ning ap ati, yupu nyabuk. Tonda, Allah El Dib Kanye arye, Allah el fil dona ati arisilye fil dona deiyok ning ati, laka nyapsuk. Tonda, minop talak malye-malye uk ulamubu bukni, winitalak ara, winiryuk kanye talima arisilibuk, Allah el mikip deice arye, diksukumuk wininamnyabe, Paulus arye, nyabuk ning ara, asurat noutamak ulule.

Paulus birye, 'Telebe,' nyana ati, nyabuk yupu

1 ¹Telebe, na kayapu, na Paulus birye, asurat sekeipsine. Allah arye, na ti teneamnuke, wipdeipnuk atonun, Yesus Kristus el yupu dobuka peterelbana ati, deiyok kounanye, Rasulnye unune. Asurat ara, anggun Efesus mutuku umunce, Allah ati dib teneplumba, elce wipdeipsuk ninye ati sekeipsine. Anggunda, Yesus Kristus ap talima dukdongobuka umunce, fia batakana kumce, el uk talibuka umunye ninye ati, asurat sekeipsine. ²Na arye anggun ti Allah morosunun ning ara, nyapnusine. Ara, nun Ni Koprop Allah ap, nun Weik Deiyoknye Yesus

Kristus ap, sik bico tenesurudakce, sik kanye aryuk melisirikce ning ap, ura, ‘Yuk nang ap talima namin asa arye neika teleb kibuka unamak’ tenena ati, aresurudake. ‘Aning nirya aresirice ning ara, anggun Efesus mutuku ninye arye, aning nirya dolonamlum’ tenen, Allah morosunune.

**Allah arye, Yesus Kristus deice kintinipsuk ning nirya
ati, Allah el si erebuka, “Telebe,” nyanyabe**

³Nun Weik Deiyoknye Yesus Kristus, el li kopropba Allah ati, “Telebe,” nyabuka fia nyanamabe. Kristus ap, kanye talima dukdongopsuka deice arye, akunum teleb kipdeipsuke. Ara, nun kanye talima teleb kilina ati patasilye ning nirya ara, im deice arye, akunum kintinibuka deiamsuke. ⁴Anyapmasin yupu ara, talye ati kum nyapne. Deiyok ara, Allah arye, aning-aning nirya, min kum kwepdeiamuk talak ara, nun ti wepdeipsukce, winibuka teneamsuke. Ara, ‘Anang ara, Kristus ap, kanye talima dukdongopniba, el deice uk ucop ura, na Allah arye, sik ti tenenamne talak nirya ara, anang ara malye winina kumce fia diksukum nang unyak,’ tenenamsine. Ara, Kristus arye, fil dopsuk deice aryuk tenenamsila ati, ‘Anang ara, fia diksukum un ninye uk unyake,’ tenenamsile. Tonda, yata nang arye do, nun ti, “Anang ara, sik malye winin ning ani, ani,” nyabuka, Allah ati kum nyapsitinge. Aning nyapmasin touk, Allah arye nun ti, ‘Wininamake,’ teneamsukce wipdeiyamsuke.

⁵Tonda, Allah fia bico teneamsuk ati, nun min kum deipsik talak arye, minop talak Allah arye, winibuka teneamsuke. Ara, ‘Anang ara, na mapu kopropba unamak’ tenen, ‘Yesus Kristus fil dopnamle deice arye, kwangnanamsine,’ teneamsukce, wepdeipsuke. Winipsuka ara, el kanye aniryuk talima ariyamsukce, nun ti kanye deiamsuke. ⁶Aning nirya akunum winipsuka ati ara, ninye nirya kel kibicop ura, “Se, Allah bico tenepsiliryne, el kanye aniryuk melibuka arisilye ning ara, weik mambule. Allah ara, fia teleb ulule,” nyabuka, el si weik arye, erenamake. Allah bico tenepsukce, talye uk arisilye ning nirya ara, el mi koprop deice arye, aripsuke. Allah arye, el Mi Koprop Yesus ati ara, kanye talima aribuka fia kanye delilule.

⁷El mi Yesus, el ining biyuk deice aryuk, nun malye wininyap ning nirya namin kipsukce, kum kipdeipsuke. Nun malye winina ati oplopsutu bukni, nun pununa ati dibuksuka deice arye lyepsuke. Nun malye ning tapu kouamsuka noutamak arye, lobuka deksukce, lyepsuke. Winipsuk ning ara, mitiktonun kume. Allah el bico tenesilye ning ap, el kanye aniryuk talye arisilye ning ap, weik arye aulye touk, weik arye ariyamsuke. Ara, nun malye ning ara, nukmanto kum wamsuk bukni, aning nirya kum kipdeipsukce lyepsuke. ⁸Allah bico tenepsukce nun lyena ati weik arye, aripsuka ara, kum nukmanto. Fia weik arye, bico

teneamsukce, lyepsuke. Tonda, weik kele bikne ap, aning-aning nirya ati, 'Deiyok ani' tenen, fia moubuka teneamuk ning ap, deice arye, lyepsuke.

⁹Tonda, minop talak Allah arye, ninye lyena ati, 'Kristus deice arye, ninye lyen ning kintinipnamne' tenen, kanye deibuka akunum teneamuk bukni, aning nirya duknyamuk arye, ninye nirya kum bikamik. Bukni, winitalak ara, akunum laka kipdeipsuke. Allah arye, 'Winipnamne,' teneamuk ning nirya ati, kanye deiyamuk ati, akunum winipsuke.

¹⁰Allah kanye deiyamukce, winibuka teneamuk. 'Kume, na teneamsi talak akunum uplyop ura, yata ning do nirya, tukwak ulul ning nirya ap, im deice ulul ning nirya ap, dopronpyak arye, tonok Weik Deiyoknye, Yesus Kristus, el amutam deipnebuk, aning nirya talibuka, teleb kibuka neiktoto unamle. Kristus ara, aning-aning nirya deice tam ulirye, weik Ninye Deiyok kibuka talinamle,' Allah arye, teneamuke. Allah minop talak teneamukce, aning nirya duknyamuk bukni, winitalak akunum lakak kipdeipsuk ning ara, akunum nyapsine. Na Paulus birye, nyapsine.

¹¹Ara, Allah elce, 'Wininamne, wininamne,' tenelul touk, aning-aning nirya talilirye fil doliba, aning nirya elce teneamuk touk, aning uk winilule. Tonok ning babye, kum batakalule. Aning atonun, minop talak, nun min kum deiamsik talak arye, Allah arye nun ti, wepdeiamsukce uteneamsuke. Yesus Kristus ati dib tenebupa deice arye, Yesus ap, kanye talima dukdongobuka ulamibya ani, sirya talak ara, Allah arye, 'Aning-aning arepnibuk, fia talinamake,' tenen, kintinipsuk ning nirya ara, aripnamsile. ¹²'Aninye ara, akunum lyepnebuk, ninye nirya eibuka kel bikikirye, na si weik arye erepnikirye, "Allah ara, fia telebe," nyabuka, kibuka fia si erenamniyake,' teneamsuk. Aning teneamsuk atonun, Allah arye, wibuka deiamsukbuk, nun Yahudi yala ninye noutamak arye, minopce Kristus ati, 'Elcuk lyepnamsile' tenen, nun kanye el deice deibuburye, dib tenebupe.

¹³Ara, anggun Yunani ninye, Efesus mutuku ululum ninye ara, Allah el dipkoprop yupu peterelamsikba, kekeplum deice arye, Allah arye anggun ap, Kristus ap, talima dukdongopdeipsuke. Allah el laka teleb yupu, ninye lyen yupu kekebuka, dib teneplum talak ara, Allah arye, "Na Dib Kanye arinamsine," nyabuka nyalilamsuknye bira, anggun ti aripsukbuk, anggun talima fum weksuke. Winipmanto ning ara, ninye arye, 'Na basam kele kipnamak' tenen, amul seklamak atonun, Allah El Dib Kanye dopropluma deice arye, akunum lak kipsukba, elce, 'Na' tenen, ninye akunum ululume.

¹⁴Allah El Dib Kanye akunum aripsuk deice arye, nun kanye talima kum boktoptibye. Kume, winipmanto ara, 'Wa wiyamubu ning nirya lilyanamap' tenen, minopce winiryuk kwaning deililbalamak touk, Allah El Dib Kanye minopce aripsuk deice arye, nun kele kinyabe. Allah arye, kintinip deiyamsuk ning nirya ara, aripsilyop ura, dipkoprop

doproptomabe. Allah arye, nun nirya ati, ‘Na mapu unamak’ tenen, nun malye winilamupa noutamak arye, akunum lopdeksuke. Lobuka deksukba, el Dib Kanye ap, ulamibye ani, aminyan sirya talak ara, fia moubuka teleb kipdeipsiliry, el dam bobinamsile. Aning-aning nirya ati ara, ninye mutuku-mutuku nirya, “Allah ara, fia telebe,” nyabuka, el si weik arye erebikirye, el ti kinamake.

**Paulus birye, Efesus mutuku nang ati teneamukce,
Allah ati, “Telebe,” nyabuka, morolamuk yupu**

¹⁵ Allah arye, teleb kipdeipnamsila ati, anggun Efesus mutuku ninye dib teneplumba, kekepse talak arye, diprongobuka, atalak nirya ara, anggun ti Allah morosunune. Ara, yuk nang arye na ti, “Sik Efesus mutuku ninye ara, nun Deiyoknye Yesus ati, akunum dib tenebike. Sikce Allah ati dib tenenyak ninye nirya ati, bico tenebuka milina uk unyake,” nyapnik. ¹⁶ Nyapnik talak arye, diprongobuka, winitalak nirya ara, anggun ti tenepniry, “Na Ni Allah telebe,” nyabuka, anggun ti Allah tuba morosunune.

¹⁷ Anggun ti Allah morosinye talak arye, moronye ning ara, laka nyapnusine. Ara, ani. ‘Nun Deiyoknye Yesus Kristus arye, si erelamak Allah ara, nun fia mambul kopronye Allah arye, anggun ti, melipsiliry, anggun kanye talima noutamak, weik kel kina deiyok ning ap, Allah tenesilye ning moubuka kekena deiyok ning ap, arinamsile’ tenen, Allah morosunune. ‘Aning arisilya deice arye, Allah el ulul ning nirya, weika arye, kel kibuka, el ap, kanye talima dukdongobuka unamlum’ tenen, Allah morosunune.

¹⁸ Tonda, aning ton Allah ati morosunune. Ara, Allah arye, anggun kanye talima noutamak, kel kina deiyok ning, dirina aripsilibuk, elce kinteneamsuk ning nirya ati, ‘Fia moubuka kel kinamlum’ tenen, Allah morosunune. Elce kinteneamsuk ning ara, ani. Ara, Allah arye, ‘Na ap, sik ap, aminyan talak ara, fia teleb ak uk neika unamabe’ tenen, yukupsukba, anggunce kintinibuka dina uk ululum ning nirya ara, moubuka kele kinamlulume. Tonda, Allah arye, ‘Na mapu ati, fia teleb kipdeipniry, fia telebuk wininamake. Winibikiba, na ap neika unamabe’ tenen, fia weik arye, kintinpeiamsuk ning, ‘Aning nirya kele kinamlum’ tenen, Allah morosunune.

¹⁹ Tonda, elce nun dib tenenyap ninye ati, el mikip weik arye, melibuka arisilye ning ara, nukuka laka kum nyapmanto ulul bukni, ‘Anirya moubuka kel kinalume,’ tenen, Allah morosunune. ²⁰ Allah el mikip weika arye, melibuka arisilye ning ara, yuk mikip kume. Ara, Allah el mikip deice arye, Yesus kam bukeibuk. Amikip deice aryuk nun ton arisiliry melisulule. Yesus Kristus dibukop ura, Allah el mikip deice aryuk Yesus kam bukdeibukce, ‘Weik Deiyoknye unamle’ tenen, Allah el

sirik taruk tam im deice bobinuka deibukba, bukuk. Yesus ara, Allah el sirik taruk tam bukukce ulule.

²¹Allah arye, Yesus dobuka el sirik taruk tam im deice bukeibuk ning ara, yata ning do, yata ninye do nirya, el amutamuk unyakbuk, Yesus ara, sik deice tam uk ulule. Aning-aning nirya, elcuk talilule. Ara, im deice ulul ning do, tukwak ulul ning do, dan mutuku ulul ning do nirya, aning-aning nirya talibuka weik ninye deiyok ning atonun ap, malye mikip ulul ning ap nirya, Yesus el amutamuk ulule.

Adeice tam ubuka, aning talibuka una deiyok ning nirya ap, im ap, tukwak ap, im sirya mutuku sirya bokuka, talinyak deiyok isa mer nirya ap, weik malye mikip ulul ning yala-yala nirya ap, Yesus elda aning nirya deice tam uk ulule. Weik mikip ulye ning ap, weik mambul ning ati, ninye arye, weik arye, si erebuka kinyak bukni, aning-aning nirya ara, sik si mitik mambul uka. Weik si kibuka erepmanto ning nirya ara, Yesus ara, aning nirya deice tam uk ulule. Elda aning nirya deice tam Weik Deiyoknye unamla ara, winitalak uk kume. Elda aminyan doyanamle talak nirya babye, atonun, aning nirya deice tam uk fia unamle.

²²Tonda, Allah arye, Kristus ati weik arye, erepdeibukba, yata ning do nirya, aning-aning nirya el amutam uliba, elda alip tam ulirye aning yala-yala nirya talilule. Aning nirya talibuka, Weik Deiyoknye ulye atonun, nunce Allah ati dib tenenyap ninye nirya ababye, nun Weik Deiyoknye usulule.

²³Winipmanto ning ati nyapnusine. Nun taruk ap, yan ap, nong ap, nirya dukdongobuka tonok nong uk unyabbuk, nun nong deice ara, kisok aupsuk touk, nun dib tenenyap ninye nirya ara, Kristus el nong atonun unyabe. Elda, nun kisok atonun, nun deiyoknye usulule. Yata ning do nirya, Yesus aning nirya taliplirye, moubuka sirya daklirye, teleb kililamle atonun, el ti dib tenebibirye, el nong atonun unyap ninye ara, nun teleb kilina ati, nun kanye talima patasilye ning nirya arisilibuk, langdisulule.

Allah arye, fia kam una deiyok ning aripsuk ning ati nyabuk yupu

2 ¹Na kayapu, anggun Efesus mutuku ululum ninye ara, minop talak anggun malye-malye winilalum ning ap, Allah el yupu yanilalum ning ap, winibuka ulalum deice arye, akunum diplamak ninye atonun ulalume. ²Minop talak ara, sik Yesus ati dib tenena kum ninye arye, malye-malye winilamak touk, anggun babye, atonun malye winilalume. Asing arye, kum eilinyap bukni, im noutamak balamak Isa mere, sik ti talipsinaba, sik weik deiyoknye Isa Mutuku Dongonye, el yupu kekebuka ulalume. Ara, Allah el yupu yaniltalamak ninye ara, Isa Mutuku Dongonye elcuk sik kanye talima taliliba, malye weik wininyake.

³Minop talak, min dib kum teneamubu talak ara, nun nirya arye, amalye wininyak ninye ap, ansinibuka ulamuburye, talye kanye bobuka,

nun kanye talima noutamak tenelamubu ning ap, malye ning patalamsuk ning ap, adeice arye, talye kanye bobuka malye-malye uk winilamubu. Amalye tenena ap, malye winina ap ara, tukwak unyak ninye nirya arye, atonun wininyake. Allah el winilul ning ara, fia kum tenenyak touk, nun babye, minop talak kum tenelamubu. Winibuka ulamupa deice arye, malye-malye winilamak ninye atonun, Allah arye, nun ninye nirya ati, ‘Aninye malye wininyaka ati, na lik’ tenen, ‘Wenebuka oplopnarne,’ teneamsuke.

⁴Malye-malye weik winilamubu ning ap, malye tuba wininyap ning ap ati, wenebuka oplopsutue. Akunum opmasutu bukni, Allah arye, nun nirya ati, fia weik arye, bico tenepsukce, lyepsuke. Lyepsukce, Kristus ap, talima dukdongopsuka deice arye, kam bulina atonun, teleb kipdeipsukce lyepsuke. Allah arye, nun malye winina ati talye oplopsutu bukni, ‘Se sikda bicoe’ tenen, namin kibuka mitang asa arye, kanye talima arisilya ara, mitiktonun arye kume. Weika arye, bico tenesulule. ⁵Nunce el yupu yaniplobuka malye-malye ulamupa deice arye, akunum diplamak ninye atonun ulamubu bukni, Kristus ap, talima dukdongopsuka deice arye, kam bulina atonun, teleb kipdeipsukce, lyepsuke. Allah arye, lyepsuka ara, yuk deice arye, kume. El bico teneamsukce, el kanye aryuk talye meilyamsuka deice arye, lyepsuke. Nun teleb winina ati kume.

⁶Kristus obik bukni, Allah arye, Kristus kam bukeibuk deice arye, Kristus ap, kanye talima dukdongopsuka anya arye, nun babye, kam bukeipsuke. Aning atonun, Allah arye, Kristus dobuka im deice bobinuka, erepdeibukba bukuk. Aning deice arye, Kristus ap, akunum kanye talima dukdongopsukce, nun babye, im deice bukeipsuke. Aning nirya ara, Yesus Kristus ap, kanye talima dukdongobuka neiktoto unyaba deice arye, kilisulule. ⁷Ara, Allah arye, Kristus ap, kanye talima dukdongobuka kam bukeipsukce, im deice tam bukeipsuka deiyok ara, ani. Ara, Allah arye, uteneamuk. ‘Aninye lyepnirye, kam bukeibuka im deice deipnyop ura, atalak arye, diprongobuka, aminyan doyanamle talak, sirya talak unamak ninye nirya, kel biknikirye, nyanamniyake.’ “Kume, nun lyena ati, Allah arye bico tenepsilirye, el kanye aryuk talye arisilye ning ara, nukmanto kume. Fia weik arye, talima aresulule. Kristus aripsuk ura, elce fil dobuka, lyepsuka deice arye, akunum laka kipsuka ati, aning akunum bikmabe,” nyabuka, ‘Na si erepnamniyak’ tenen, Allah arye, aning nirya fil dopsukce, lyepsuke.

⁸Allah el kanye aryuk lyepsuke nyapmasina ara, talye ati kum nyapmasine. Deiyok ara, ani. Anggunce, Allah ati dib tenelulum deice arye, Allah bico tenepsilirye, talye uk lyesulule. Aning ara, anggun teleb fil dobuka, diksukum ululuma deice arye, kum lyesulule. El kanye aryuk bico tenepsukce, lyepsuke. El kanye aryuk lyesulula ara, ‘Talye dem aryuk dib tenena deiyok ning aripniba, aninye arye, dib teneptinge’

tenen, aripsilirye, kanye deibuka lyesulule. ⁹Nunda teleb fil dolamupa deice arye, kum lyepsuka ati, yata ninye do nirya, sikce, “Kume, na teleb fil dolamsa deice arye, lyepnuke,” nyabuka kwalin yupu kum nyaptinge. ¹⁰Allah el kanye aryuk lyepsukce, teleb kipdeipsuka ati ara, Kristus ap, talima dukdongopsuka deice arye, winiryuk ninye atonun kipdeipsukba, unyabe. Lyepsukce, winiryuk ninye atonun kipdeipsuka deiyok ara, ani. Ara, minop talak Allah arye, nun dib tenenyap ninye ati, “Teleb winin ning yala-yala nirya fil dobuka unamake,’ teneamsuka ati, Kristus deice arye, winiryuk ninye kipdeipsukba, unyabe. Na Paulus arye, nyapsine.

**“Kristus ap, talima dukdongobuka unyaba deice arye,
tonok yala nang atonun unyabe,” nyabuk yupu**

¹¹Ara, na kayapu, Allah arye, tonok nong atonun akunum kipdeipsuka ati ara, na nyapnusin yupu ara, luba kum kipnamlulume. Minop talak Yahudi yala nang arye, anggun Efesus mutuku ninye ati, nyalamsik. “Anggun Efesus mutuku ninye ara, anggun apu yapu ara, Yahudi yala kum nang arye, deipsika ati, sikda bai tam nang atonun unyake. Yahudi yala kum ninye unyake. Sikda den bola mouse ning kum sekenyaka^a ati, sikda malye nang unyake,” nyalamsik. Ayupu nyalamsik ninye arye, sik badamnye ati nyalamik. “Nunda Yahudi yala ninye ara, yuk nang nirya, ‘Sikda Allah el mapu koprop unyake tenenamsiyak’ tenen, den bola mouse ning sekenyapa anya arye, nunda teleb nang unyabe,” nyalamik. (Nyalalamik bukni, den bola mouse ning sekana ara, ninye taruk arye, fil donyaka ati ara, adeice arye, Allah el mapu koprop kum kipdatibye.)

¹²Tonda, minop talak ara, anggun ap, Kristus ap, talima dukdongobuka min kum ulalume. Anggun apu yapu ara, Israel yala ninye kum ulamika ati, Israel yala ninye ap, ansinibuka neika kum ulalume. Allah arye, Israel ninye ati, “Wininamsine, winibuka, winibuka arinamsine,” nyapdeiyamuk bukni, anggun Efesus mutuku nang ara, bai tam ninye asik nang atonun ulaluma ati ara, aning nirya ara, kum dopropmanto ulalume. Anggunda, Allah el si bikna ap, el ti dib tenebuka neiktoto una ap, fia kum ulaluma ati, ‘Allah arye, lyepnamsila ati, kintinibuka dinamabe,’ kum teneamlume. Talye demuk ulalume.

¹³Minop talak ara, anggunda pera mutuku fia unyak ninye, fia bai tam ninye atonun ulalum bukni, winitalak ara, kume. Kristus el ining panabuka biyuka deice arye, Kristus ap, kanye talima dukdongobuka, akunum tonok nang kipdeipsuka ati ara, Allah el tam nang kipdeipsukce, el dam akunum dopdeipsuke. Winitalak anggun babye, Allah el mapu akunum ululume.

^a 2:11 *den bam bol mouse ning sengna* – Ayupu deiyok kel bikna ati, laka nyana yupu nomor 19 dirume.

“Minop talak ara, yuk-yuk ulamubu bukni, Kristus deice arye, kanye talima dukdongopsukce, ansinibdeipsukba, Allah el mapu unyabe,” nyabuk yupu

¹⁴Minop talak ara, nun Yahudi yala nang ap, anggun Yahudi yala kum nang ap, neika dukdongobuka una kumce, fia yuk-yuk ulamubu. Bukni, winitalak ara, Kristus el nong tonok dibuk deice arye, nunda insinipdeipsuke. Min arye, nun danatam, anggun danatam anoutamak ara, weik cang poka atonun wamukba, kanye talima wilipdanamuburye, eipdanmanto kum ulamubu. Winibuka ulamubu bukni, Kristus arye, apoka atonun domsuk ning ara, daklobukce tonok yala nang atonun, akunum dukdongopsuke. Winipsuka ara, Yesus Kristus arye, nun pununa ati, el dipsuk deice arye, lyepsuke.

¹⁵Nun ap, anggun ap, ‘Nun lik,’ tenelalamuburye, kanye talima wilipdanuka fia yuk-yuk ulamubu. Bukni, Allah arye, “Aning wininamlulume, aning ara, kum wininamlulume,” nyapdeibukba, Musa arye, sekeipsuk yupu ara, mem yupu wamuk ning ara, Yesus dibuka deice arye, akunum sirya dakukce, kum kipdeibuk. Amem yupu weik aubukba, nun Yahudi ninye arye, ayupu talibuka ulamubu bukni, Kristus el nong aripsukce, lyepsuka deice arye, amem yupu niry kum kipdeipsuke.

Winipsuka deiyok ara ani. Ara, ‘Yahudi yala nang ap, Yahudi yala kum nang ap, yuk-yuk unyak bukni, na nong deice arye, aninye niry kanye talima dukdongopniba, nong tonok atonun kibuka ukiry, winiryuk nang atonun unamake’ tenen, winipsuke. Yesus el nong aripsuk deice arye, akunuma, nun Yahudi yala nang ap, anggun Yunani yala nang ap, el Yesus ap, kanye talima dukdongobuka namin arye, teleb kipdeipsukba, winitalak ansinibuka nun neika unyabe. Winitalak ara, ‘Like,’ kum tenelanyabe. Mangkau kanye bobuka neika dukdongopdanuka unyabe.

¹⁶Tonda Allah arye, uteneamuk. ‘Na wanwanun yo deice opmaniyaka deice arye, aninye niry ap, na ap, kanye talima dukdongobuka teleb kipdeipnyop ura, Allah ap, aninye niry ap, ansinibuka teleb ulinamne,’ teneamsukce, nun pununa ati dibuk. Wanwanun yo deice dibuka deice arye, nun Yahudi yala nang ap, anggun Efesus mutuku ululum Yahudi yala kum nang ap, ‘Nun like,’ tenelalamubu ning deiyok ara, akunum kum kipdeipsuke.

¹⁷Kristus yayukce, Allah el laka teleb yupu, ninye lyen yupu peterelamsuke. Ninye yala niry ap, Allah ap, kanye dukdongobuka neiktoto teleb una ati, el yupu peterelamsukba, anggun fia bai tam ulalumce, Allah damak ara, fia pera atonun ninye ulalumbuk, anggun babye, kekelamlume. Aning atonun, nun Yahudi yala ninye Allah dam ara, miningdam ton unyap ninye babye, ayupu ton kekelamubu. ¹⁸Ara, anggun ap, nun ap, ura ninye aning-aning niry babye, nun Ni Koprop

Allah ap, kanye talima dukdongobuka neiktoto una ati, tonok bisik uk usulule. Tonda, ninye ap, Allah ap, ‘Lik’ tenelana kumce, kanye deibuka teleb una ati ara, Yesus Kristus dibuka deice arye, dib tenebibyop ura, Allah El Dib Kanye aripsiliba, Allah ap kanye deibuka neika unyabe.

¹⁹Kristus deice arye, Allah ap, neika unyaba ati ara, minop talak anggun Yahudi yala kum ninye ara, yuk mutuku ninye asik nang atonun, fia bai tam ninye atonun ulamlum bukni, winitalak ara, kume. Winitalak ara, anggunda Allah arye, ‘Anang ara, na mapu koprop’ tenen, talisulul ninye nirya ara, ansinibuka, tonok mutuku nang atonun kipdeipsukba, neiktoto unyabe. Anggunda, dipkoprop Allah el yala nang, el mapu koprop ululume.

²⁰Winipmanto yupu ton nyapnusine. Aik dona deiyok nang arye, fia unamle aik dopnamikce talak ara, anyaik ayukumna ati, tuku palibuka, keil yangapdeibikirye, adeice ak, aik nong dolamak atonun, Allah arye el mapu nun nirya ati, teleb kilisulule. Allah el yupu dobuka peterelbana ati, deiya kouna deiyok nang, Rasul nang ap, Allah el yupu laka nyabuka peteresinyaka deiyok nabi-nabi nang ap, sikda aik ayukumna ati, keil yangaldelilamak atonun winisinyake. Fia aik dopnamikce talak ara, aik dika deililamak keil ara, ‘Aik abilinga nirya funguk upnamle’ tenen, konop keil deibikirye, akeil deice, anyaik nong nirya dobuka deililbalamak touk, Kristus el babye, akonop keil atonun, nun Deiyoknye usulule.

²¹Aik dopmakce talak, aik nong dopnin balamica ani, aning-aning nirya dukdongobuka dobikirye, sirya daklamak atonun, Kristus ap, ansinibuka unyaba deice arye, Allah arye talima dukdongobuka, tonok aik nong atonun unyabe. Nunda, Allah el pung diksukum aik atonun unyabe. Elce, ‘Anyaik fum tam ara, na unamne’ tenen, nun kanye talima noutamak fil dosulule.

²²Ara, anggun Efesus mutuku ninye babye aning atonun, Kristus ap, kanye talima dukdongobuka ulamunyop ura, Allah arye anggun ap, yuk dib tenenyak ninye nirya ap dobuka, tonok aik nong atonun kilisululce, dukulongosulule. Anyaik fum tam atonun ara, nun talima ara, Allah El Dib Kanye arisilibuk, wekuka usilya deice arye, Allah el babye, nun talima fum tam usulule.

Paulus birye, “Yahudi yala kum ninye arye, ‘Allah ati dib tenepnamak’ tenen, fil donune,” nyapdeibuk yupu

3 ¹Na kayapu, arup nyapmasin touk, Allah arye, nun nirya ati, Kristus fil dopsuk deice arye, nong tonok atonun kibuka, kanye talima dukdongopsuka ati ara, na arye anggun Yahudi yala kum ninye ati, Allah morosunune. Winitalak ara, na arye anggun ti, Yesus Kristus el yupu peterelamsise ati, yu nang arye, na tomobuka tapu koubuka

wenena aik dongopnikba, unune. ²Ara, na kanye ara, na nyapnusin yupu ara, yuk nang arye, akunum laka nyabikba, kekepnulume. Ara, Allah arye, anggun Yahudi yala kum ninye ati, bico teneamsukce, el kanye aryuk, ‘Sik melibuka lyepnamne’ tenen, kintinipsuk ning ara, ‘Paulus birye, ayupu dobuka peterelbinamle’ tenen, elce na wipdeipnukba, el laka teleb yupu, ninye lyen yupu, anggun ti peterelyasise. ³Aning ara, asurat noutamak arye, mitikanun akunum sekmasine. Ara, Allah arye, ‘Wininamne,’ teneamuk ning, minop talak duknyamukbuk, ninye kum bikamik bukni, na kanye talima tamupnukce, laka arye, nyapnuke.

⁴Ati, na akunum sekmasin yupu dobuka yinipnamlum deice arye, moubuka kekepmunce, kel biknamlulume. Ara, Allah arye, ‘Wininamsine,’ teneamsukce, Kristus fil dopsuka deice arye, akunum kintinipsuk bukni, dungnyamsuk ning, ‘Deiyok ani’ tenen, moubuka kel bikamse touk, asekmassin yupu yinipmunce, ‘Anggun babye, kel biknamlume’ tenen, nyapsine. ⁵Allah arye, Kristus aripsukop ura, elce fil dopsuka deice arye kintinipsuk ning ara, minop talak ulamik ninye nirya ati, lak akarye, kum nyalamuk arye, kum biklamik. Bukni winitalak ara, Allah el yupu dobuka peterelbana ati, deiyok kouna, deiyok Rasul nang ap, el yupu laka nyabuka peterena ati nabi-nabi nang ap ati, Allah El Dib Kanye arye, ayupu nirya lak akarye, nyaliba, anang nirya moubuka kel bikinyake. Adeiyok nang nirya ara, Allah arye, wipdeiyamuka anya arye, sikda malye winina kumce, fia pung diksukum nang unyake.

⁶Allah arye, duknyamuk bukni, el Dib Kanye arye, laka nyasulul yupu ara, ani. Ara, Allah el laka teleb yupu, ninye lyen yupu kekebuka dib tenebikca deice arye, sik Yahudi yala kum ninye babye, Allah doproplirye, melibuka talinamle. Sik babye, el mapu unamake. Allah arye, Yahudi yala ninye, Israel ninye ati, “Wininamsine,” nyalilamuk ning nirya ara, anggun Yahudi yala kum ninye babye, dolonamlume. Anggun ap, Israel ninye ap, kanye talima dukdongobuka, nong tonok atonun akunum teleb kipdeipsuke. Tonda, Allah arye, “Kristus deice arye, winibuka wininamsine,” nyabuka nyalisilye ning nirya ara, anggun ap, nun ap, neiktoto uk dolonamabe. Aning nirya dolonamaba deiyok ara, el laka teleb yupu, ninye lyen yupu dib tenenyap deice arye, arisiliba dolonyabe.

⁷Ara, Allah arye ninye lyena ati, el laka teleb yupu peteren, fil donanye kipdeipnuka deiyok ara, laka nyapnusine. Ara, Allah bico tenepnukce, el kanye aryuk, afil dona deiyok ning talya urdemuk aripnukce. Allah el mikip arye, fil dopnuk deice arye, ‘Na laka teleb yupu peterena deiyok kounanye unamle’ tenen, akunum wipdeipnukce. ⁸Na kanye ara, Allah el mapu nirya ara, ilil weik asa unyak bukni, na Paulus ara, ilil fia kumnye unune. Na ara, ilil fia kumnye ununa babye, Allah el kanye deipnukce, ‘Paulus ara, Ninye Lyena Yupu, Kristus el fia teleb yupu bobuka, Yahudi

yala kum ninye peterelbinamle,' tenepnukce, wipdeipnuke. Allah arye, Kristus deice kintinipdeipsukce, el ap kanye dukdongobuka upyop ura, arinamsil ning nirya ara, nukmanto kum ati, nunce kum biktibye.

⁹Tonda, Allah arye, tenepnuke. 'Paulus bira, na yupu laka nyabuka peterenamle,' tenepnuke. Aning ara, ani. 'Ninye nirya moubuka kekenamak' tenen, Allah arye, ninye lyena ati, bico tenepsiliryne, el kanye aryuk fil donamsil ning ara, 'Paulus bira, "Allah arye, winibuka, winibuka wininamsile," nyabuka, peterenamle' tenen, wipdeipnuke. Allah arye, aning-aning nirya kwepdeiyamuk deiyoknye birye, ninye lyena ati teneamsuk ning ara, dungnyamukce el demuk kel bikamuk. Aning nirya duknyamuk bukni, Allah arye na ti, 'Aning laka nyapnyop ura, Paulus kekepliryne, aninye nirya ati laka nyabuka peterelbinamle' tenen, wipdeipnuke. Na Paulus arye, nyapsine.

¹⁰Atalak noutam nirya, Allah arye, 'Wininamne,' teneamsuk ning ara, winira akunum lak kipmasile. Ara, ani. Allah arye, lyepsuk ura, el ti dib tenenyap ninye noutamak fil dosilye ning nirya arye, im deice unyakce, ninye deiyok nang ap, im deice mikip weik unyak nang ap, eipsikirye, 'Se, Allah ara, aning-aning nirya moubuka tenepliryne, fia weik mambulnye, ulule' tenen, kel bikinamake. ¹¹Aning nirya ara, talye ati kum wamuk. Kume. Minop talak Allah arye, aning nirya ati, 'Winibuka winipnamne,' akunum teneyamuka anye arye, aning dipkoprop teneamuk touk Allah arye, nun Deiyoknye Yesus Kristus deice fil dopsukba, adeice arye, akunum lak upsukba, kel bikinyabe. ¹²Nunce Yesus Kristus ati dib tenebibirye, el ap, talima dukdongobuka unyap deice arye, nun Ni Kopropa Allah ati moroptibye. Tonda, Allah ati moronyap talak ara, kanye teniltona kumce, 'Dipkoprop kekepsiliryne, kum bataknamsile' tenen, ilil kum asa aryuk, nun talye kanye bobuka yupu nyaptibirye, el ti moroptibye. Ara, Yesus dib tenenyap deice arye, wininyabe.

¹³Ati, na kayapu, anggun Efesus mutuku umunye ninye, anggun melina ati, fil dolamsa ati, winitalak ara, na nong deice ikin ning delininyakba, donmana ati, anggunce, 'Se' tenen, imun kanye kum bonamlulume. Anirya ara, anggun teleb kilina ati wininune anye arye, kanye deibuka unamlulume.

Paulus birye, Efesus mutuku nang ati Allah morobuk yupu

¹⁴Ara, na kayapu, Allah teneamsukce, fil dolamsuk ning nirya ara, tenepne ning ara, nun Ni Kopropa Allah ati, 'Anda fia teleb' tenen, urasin kanupdongobuka moronune. ¹⁵Nun Ni Koprop Allah arye, el mapu nirya ara, im deice unyak nang babye, tukwak mutuku unyak nang babye, kwepdeiamsuka anye arye, elda nun ni kopropa usulule. El si uk erebibirye, el mapu unyabe. ¹⁶Na Paulus birye, anggun ti, Allah morosunun ning ara, nyapnusine. Ara, 'Nun Ni Allah kopropa arye,

aning-aning nirya talilulce, mambul weiknye ulye touk, el Dib Kanye arisiliba, melisilya deice arye, el mikip weik aresiliba, anggun kanye talima weik arye, melinamsile' tenen, Allah morosunune.

¹⁷Winipsilyop ura, anggun dib tenelulum deice arye, Kristus anggun kanye talima noutamak usiliba, el ap, kanye dukdongobuka unamlume. Tonda, weik yo yating tuku fumbisik bilirye, weik neplyop ura, ayo lulukna kumce fia teleb tiklamle touk, Allah bico tenepsilirye, melisilye ning noutam ululuma deice arye, 'Sik yuk nang nirya ati, bico tenebuka melilamunce, fia teleb unamlum' tenen, Allah morosunune.

¹⁸Tonda, Allah el mikip melibuka aresilya adeice arye, anggun ap, Allah el mapu nirya ap, anggun nirya Kristus arye, kanye arisilye ning ara, 'Weika arye, kel kinamlum' tenen, Allah morosunune. Kristus bico tenepsilirye, weik arye, melisilya ara, fia kum nukmanto. Ninye arye, weik mutuku dup, el cang ap, pala ap, el kup-kup dana-dana ap, amutuku dup bukuka cang ap, tapu deibuka kum kiklipmanto ati ara, Kristus arye, bico tenepsilirye, el kanye aryuk, melisilya ara, laka nyapmanto kum ulule. ¹⁹Kristus arye, kanye arisilya nirya ara, moubuka kum kel kiptibye bukni, elce bico tenepsilirye, melisilye ning dolomunce, el ap, talima dukdongobuka umunyop ura, aminyan ara, Allah el fia teleb winilye touk, 'Anggun babye atonun, fia teleb wininamlum' tenen, Allah morosunune.

²⁰Nunce Allah ati, 'Winipsutue' tenen, yupu deice moronyap ning ap, nun kanye talima noutamak tenenyap ning ap ati, 'Anirya ara, fia weik,' tenenyap bukni, nun Ni Allah ara, weik mambulnye, mikip fia weiknye ulula anya arye, nun morolamap ning ap, tenelamap ning ara, mitiktonunuk ulule. Elce nun kanye talima noutamak fil dosilye mikip deice arye, nun kum tenelamap ning ara, fia mambul weik ning, fil dopsutue. ²¹Nunce Allah ati, dib tenenyap ninye, nun noutamak arye, fil dosiliba, fia teleb unyap ning ap, ura Yesus Kristus arye, fia mambul fil dosilye ning ap, anirya adeice arye, Allah el si weik arye, erenamabe. Ara, winitalak ap, aminyan doyanamle talak nirya ap, "Allah elda fia mambule," nyabuka el si erenamabe. 'Aning ara, nun ap, nunce debibyeba dadeipdanin, banamak ninye babye, Allah el si uk fia erenamak' tenen, patanulule. Aning ara, 'Dipkoprop winipnamle' tenen, na Paulus birye, "Amin," nyapsine.

"Nun dib tenenyap ninye nirya ara, kanye yuk-yuk tenena kumce, tonok kanye bobuka, teleb ubuka ansinibuka unamabe," nyabuk yupu

4 ¹Ara, na kayapu. Nun Deiyoknye Yesus ati fil dolamsiba, yu nang arye, tomopnikce, tapu koubuka wenena aik dongopnikba, asukum uk unune. Na arye anggun ti nyapsine. Allah ati dib teneplum arye, akunum lyepsuka ati ara, Allah arye anggun ti, 'Na mapu unamaka ati,

winibuka, winibuka diksukumuk wininamake,' teneamsuk atonun, adip aryuk aning uk tenebuka unamlulume, nyapsine. ²Talya-talya winina kumce, yuk nang sik amutam bukuka kanye talima darapdongobuka telebuk unamlume. Yuk nang ati minopce lik upsiliba, derelana ap, wenena ap, kum bukni, malye upsikca babye, 'Dauplye' tenen, bico tenepdamunce, nimalye arye, melilana uk unamlulume.

³Allah El Dib Kanye nun talima fum weksukce, nun nirya ati kanye dukdongopsukce, nong tonok nang atonun kipdeipsukba, unyabe. Ati, 'Kanye talima dukdongobuka telebuk unyaba ara, malye winibibyeba, bokuka yuk-yuk ubibirye, malye ning winibibya deice arye nong sekdayipyak' tenen, fia pi dobuka piripdemunce, yuk nang nirya ati, nimalye arye, teleb ubuka neiktoto unamlulume. Ninye weik ululum bukni, tonok kanye bobuka, talima dukdongobuka telebuk unamlulume.

⁴Nun dib tenenyap ninye nirya ara, kanye dukdongobuka nong tonok atonun unyabe. Allah El Dib Kanye arye, tonok nong atonun kilisulule. Aning atonun, Allah arye nun ti, 'Aninye lyepnamne' tenen, yukupsukba, dib tenebuburye winitalak ara, 'Elcuk dolyasilyop ura, el ap, neika fia unamaba ara, dan talak arye, dolyanamsil do' tenen, aning atibuk kintinipdeibuka dina uk unyabe.

⁵Nun Weik Ninye Deiyoknye tonok ulule. Nun dib tenebuka talinyap yupu ara, tonokuk ulule. Dib tenebivyop ura, mek dongosinyaka ara, tonok ulule. ⁶Nun dib tenenyap ninye ara, nun Ni Kopropa Allah tonok usulule. Elcuk nun nirya ara, lyepsukce, tonok nong atonun kipdeipsuke. Nun Ni Kopropa Allah ara, aning-aning nirya deice tam ulirye, aning nirya talilule. Aning-aning nirya talilya deice arye, fil dolule. Nun dib tenenyap ninye nirya ara, nun kanye talima noutam usulule.

⁷Ara, nun nirya ara, nong tonok atonun unyap bukni, Kristus arye, teneamsuk touk bico tenepsukce, 'Mambul fil teleb kibuka donamak' tenen, el mikip deice arye, fil dona deiyok ning yala-yala nirya bokuka, yuk-yuk aresulule. ⁸Winibuka arisilya ati ara, Allah yupu noutam ton ayupu sekik. Ayupu ara, ani.

'Allah arye, nyabuk. "Elda im deice welebuk talak ara, el minopce biyukba, el mikip arye, akunum bisibuka yaniplobuk nang nirya ara, el aminyan tam banmek. Im deice biyukop ura, sik tukwak mutuku unyak ninye ati, fil dona deiyok ning yuk-yuk bokuka aribuk," nyabuk.'

(Mazmur 68:18)

⁹Ayupu nyabuk noutam ara, "Welebuke," nyabuk deice arye, akunum laka upsile. Ara, im deice tuba tamubuka min kum welyamuk talak ara, minop talak tukwak mutuku yanamuk. ¹⁰Tukwak mutuku yayuknye bira, yuknye kume. Ara, im deice welebuknye Yesus Kristus uka. Tuba tamubuka im deice tam welebuka deiyok ara, 'Im sirya, mutuku sirya aulul ning nirya ara, tenepnirye, aning-aning nirya deice tam na unyop ura, aning nirya teleb unamne' tenen, im deice welebuk.

¹¹El Kristus aryuk, 'Afil, yala-yala nirya donamak' tenen, el mikip deice arye, fil dona deiyok ning yala yuk-yuk bokuka, tukwak ninye ati aripsuk ning ara, ani. Allah yupu dobuka peterelbana ati, deiyok koupnamik Rasul nang ap, "Allah yupu ani," nyanyakce, aminyan winipnamle ning lak lena nabi nang ap, Allah ati dib kum tenenyak ninye, 'Dib tenepnamak' tenen, peterelbana nang ap, Allah ati dib akunum tenebik ninye, sik deiyok nang ap, Allah yupu sekik ning peterena nang ap, afil dona deiyok ning nirya, el mikip deice arye, bokuka yuk-yuk aripsuke.

¹²Aning nirya aripsuka deiyok ara, 'Allah ati dib tenenyak ninye arye, teleb fil moubuka dobikirye, yuk dib tenenyak ninye ati, melibuka unamak' tenen, aripsuke. Aning atonun, Allah dib tenenyak ninye arye, ateleb fil nirya donamaka deiyok ara, 'Dib tenebikcop ura, Kristus ap, talima dukdongobuka ubikirye, el nong tonok atonun unyak ninye nirya melipdakirye, sik kanye wisiplibuk, teleb ulilanamak' tenen, afil dona deiyok ning yala-yala nirya donamabe.

¹³Aning fia fil dobuka melipdabirye, daulamibya ani, aminyan talak ara, nun dib tenenyap nang nirya ara, tonok kanye bobuka, ansinibuka, Kristus ati dib tenebibirye, Allah el Mi Kopropa Kristus ap, kanye talima dukdongobuka ubibirye, el ti weika arye, kel biknamabe. Winibuka upyop ura, nun kanye talima wisipsilirye, Kristus fia diksukum, teleb kibuka ulamle touk, nun babye moubuka, telebuk kipdeipnamsile.

¹⁴Fia moubuka telebuk kipdeipsilye talak ara, mitik mapu arye, 'Aning dib do, tilila do?' tenen, teniltona uk ulamak touk, tuba kum unamabe. Aning atonun, mek linglinga mekwen deice bolkekenmalye talak ara, itam-utam kilanmalya ani, bobalamle tonun kum unamabe. Aning atonun, tonda yo bok tuku deice sakmalibuk, kumanya doplye talak ara, kumanya mikip arye, otam binaplye, atam yanaplye kinmalya ani, erelolamle atonun, kum unamabe. Sik yuk nang arye, talye peterenyak yupu, yala yuk-yuk peterepsikca babye, ayupu kekena kum, yupu tunimabuka unamabe. Sikda, 'Anang ara, nun tam uk kipedopsiting' tenen, tenepce talye tilila yupu peterepsikca babye, kanye boktopsilirye, nun kanye orbina ayana kum kinamsile.

¹⁵Aning kum bukni, kanye teniltona kumce, kanye talima aripsiliba, Allah el dipkoprop yupu peterelanamabe. Bico tenepdabirye, dib yupu uk nyabuka peterelanamabe. Winibuka ulamibya ani, Kristus ap, kanye talima dukdongobuka ulamibya ani, nun talima wisipsilya deice arye, nun wininamap ning nirya ara, telebuk unamsile. Kristus ara, Nun Deiyoknye diksukum winilye touk, nun babye neiktoto wininamabe. Winipmanto ati ara, elda nun nong kisok atonunye usulule. Nunda, el nong atonun unyabe. Ati elce tenesilye touk, aning uk wininamabe.

¹⁶Tonda, nun taruk ap, yan ap, nong deice upsuk ning, mil-mil arye, dukdongopsiliba, nun nong tonok aryuk, fil teleb ubuka dolamabe. Aning

atonun, nun yuk-yuk unyap bukni, Kristus nun Deiyoknye nun talima talisilirye, el mikip deice arye, dukdongopsilyop ura, nun fil yala yuk-yuk donyap deice arye, kanye talima arepdanuka melilanyabe. Wininyaba deice arye, nun kanye talima nirya wisisulule. Atalak noutamak nirya ara, nun nirya arye, yuk dib tenenyak ninye nirya ati, kanye dukdongobuka, bico tenepdabirye, melilanamabe.

“Nun dib tenenyap nang ara, Allah el mapu unyaba ati, el teleb ulye touk, nun babye, atonun unamabe,” nyabuk yupu

¹⁷Ara, na kayapu, anyapnusin yupu ara, talye ati kum nyapsine. Kume, na ara nun Deiyoknye Kristus, el fil melina deiyoknye ununa deice arye, ayupu nyapdeipnusine. Anggun Yahudi yala kum nang ara, dib tenena kumce, anggun kanye talima noutamak talye-talye tenenyak nang deice arye, malye-malye winilamak touk, anggun Efesus mutuku nang arye, sik talye nang wininyak atonun tuba kum wininamlume. ¹⁸Sik dib tenena kum ninye arye, ‘Allah el winilul ning ara, nun lik’ tenen, kum kekelamikce, sik kanye talima fia gat akunum kibukba, fia walwal nang akunum unyake. Unyaka anya arye, sik kanye tenen ning nirya ara, kuna atonun akunum ubukba, Allah ap, kanye dukdongobuka neika upmanto kum ninye akunum unyake.

¹⁹Winibuka unyakce, sik kanye talima noutamak ara, ‘E, awinin ning ara, malye ning ati, Allah arye, wenepsilyak’ tenen, malye kanye bobuka kum tenepmanto nang unyake. Winitalak ara, ‘Malye ning anye, teleb ning anye’ tenen, moubuka kum tenenyake. Winibuka talye kanye bobuka fia malye ukirye, ubula yolana ning aning-aning nirya ap, malye-malye winin ning nirya ap, weik arye, wininyake. Wininyakce, ‘Kume, amalye winin ning yala-yala nirya ara, tuba tonap wininamabe’ tenen, pataplubuk unyake. Sik fia malye wininyak ning ara, fia kum bataktinge.

²⁰Bukni, na kayapu, anggun Efesus mutuku ninyeo, anggunda amalye-malye winin nang atonun ning deice arye, kum peterelamsikba, Kristus ap, kanye talima dukdongobuka un ning ara, kum bikamlume. ²¹Aning fia kum bukni, na kele. Yesus babye, el nong ap, el yupu ap, el winilul ning ap, fia diksukum winilye touk, adeice aryuk peterelamsikba, Kristus el yupu kekeplumce, el ti moubuka kel bikamlume.

²²Ara, anggunda peterelamsikba, kel bikamlum ning ara, tuba tamubuka tonap nyapnusine. Ara, anggun minop talak dib kum teneamlum talak ara, anggun kanye talima noutamak malye ning patalamsuka deice arye, anggun winin ning nirya malye kililalalume. Fia malye anya arye, “Pubundanalamle butum aling kwiribuka bataklamak touk, anggunce minop talak malye winin ning min arye winilamlum ning ara, aning nirya bataklulume,” nyabuka peterelamsike. Malye winin ning patana deice arye, teleb tenen ning ara, kum kipnin balamlya ani, sirya dakalule. Winiplyop ura, teleb kibuka kum tenepthybe.

²³Tonda, ayupu peterepsik. Ara, “Winiryuk butum aling ongolamak atonun, Allah el mikip deice arye, anggun kanye talima noutamak niryia winiryuk ning atonun kipdeipsiliba, winiryuk diksukum ninguk tenenammlume. Allah arye, winiryuk ninye atonun kipdeipsuk ning ara, kel bikmunce unamlume. ²⁴Aning ara, Allah arye, utenebuk, ‘Kume, malye ning tonok babye, kum uniliba, fia diksukumuk unye touk, na mapu babye, atouk unamake,’ tenepsukce, winiryuk kanye aripsuke,” nyabuka peterelamsikba, akunum kekebuka kel bikamlume.

²⁵Ati ara, Allah arye, ‘Na unye touk diksukumuk unamake,’ tenesulula ati ara, winibuka unamlume. Ara, na tenebuka, tilila yupu nyalamak ning niryia batakuka, anggun neikak ululum ninye ati, dipkoprop yupu uk nyanamlume. Nun niryia ara, nong tonok atonun kibuka unyaba ati, dipkoprop yupu uk nyalanamlume. ²⁶Allah yupu sekamik atonun, anyuk wininamlume. Ayupu ara, ani.

‘Yu upsilye talak ara, dipkoprop malye kum kililanamlume.’

(Mazmur 4:4)

Tonda, anggunce yuk nang ati, yu upsilye talak ara, minopce lipsisikdanamlume. Yu tuba upmasilibuk, kiting wekelbilye, kuna daklyop ura, fia malye ati, winina meme. ‘Mapmapya ambusum noutam aryuk lipsisiknamap,’ tenena kume. Yu upsiliba, tulum kanye bopdamunye talak ara, minopce lipsisikdanamlume. Minopce lipsisikdanamlume. ²⁷Tonda, malye winina deiyoknye, Isa Mutuku Dongonye birye, anggun ti, ‘Anang sik talima lipdopniba, malye winipting’ tenen, kalikisulul ati ara, el ti mitiktonun babye lo arina, meme.

²⁸Min arye, ubula dolamik nang ara, winitalak tuba tamubuka tonap, ubula kum donamake. Aning kum bukni, ‘Sik bona utotowa talina kum ninye ati na ning noutamak arye bokuka, sik ti melibuka arepnamne’ tenen, sik bidamnye taruk deice arye, yuk ninye melipmanto fil, teleb fil adip aryuk donamake.

²⁹Teleb fil donamak talak ara, tenebuka tilila yupu kum nyanamake. Dib yupu uk nyabuka, teleb kipdanuka fil donamake. Malye nang arye, yupu nyakibuk, yuk ninye kekenyakce, malye kanye bolamak yupu atonun yupu niryia ara, kum nyanamlume. Aning kum bukni, anggunce yuk ninye ati, ‘Sik ikin upyle ning yata ning do? Yata teleb yupu nyaptinya deice arye, sik talima kwa diptinye do?’ tenepmunce, ninye talima kwa dina yupu uk nyanamlume. Ara, ‘Na yupu teleb ubuka nyapnya deice arye, sik kekepnamake ninye melipnamne’ tenen, yupu moubuka nyanamlume. ³⁰Tonda, anggun winimunye ning niryia ati, winibuka tenenammlume. Winipniba, Allah El Dib Kanye arye, kekebuka eipniliry, ‘Se, sik malye wininmake,’ tenepniliry, ‘Malye kanye boplyak’ tenen, malye una kumce, fia diksukumuk unamlume.

Allah El Dib Kanye ara, talye ati kum aripsuk bukni, basam amul seklamak atonun, Allah El Dib Kanye aripsuka deice arye, urasin kintinilina atonun winipsuke. Ati, adeice arye, nun kele. ‘Akunum lyepsukce, deksuka ati ara, daulamibya ani, sirya talak weik mambul sum ara, sirya memeproplirye teleb kipdeipsilirye, el dam bobinamsil’ tenen, bikinyabe.

³¹Tonda, yu usilye ning ap, yuk nang malye upsikiba yu usilye ning ap, derelana ap, yupu deice walana ap, anirya ara, batakanamlulume. Tonda, yuk nang arye, ‘Anang ara, malye nang, tenepnamak’ tenen, lulupdeibuka nyalulum yupu ap, yu usiliba, yuk nang ati malye-malye winina ap, nirya ara, batakanamlulume. ³²Amalye winin ning nirya akunum batakmunyop ura, anggun nirya arye, yuk ninye nirya ati, bico tenebuka melilana uk unamlume. Wininamlum talak noutamak ara, yuk nang arye, anggun ti, malye usinyak ning ati ara, ‘Dauplye,’ tenebuka, namin kinamlulume. Ara, Allah arye, anggun ap, Kristus ap, kanye talima dukdongopsuka deice arye, anggun malye winin ning nirya ara, kum kipdeipsukce, namin kisilya atonun, anggunce yuk nang ati, atonun wininamlulume. Na Paulus arye, nyapsine.

**“Malye winin ning nirya batakuka, Allah fia diksukumuk
ulul touk, unamlulume,” nyabuk yupu**

5 ¹Allah arye, anggun nirya ati, ‘Na mapu unyak,’ tenepsilirye, kanye talima melisiliba, anggunda el mapu akunum ululuma anya arye, Allah fia diksukum ulye touk, kel kipmunce, ‘Nun babye, atonun unamap’ tenen, unamlume. ²Ara, minop talak ulamik Yahudi ninye arye, ‘Allah nun malye winin ning namin kipsilirye, nun moronyap yupu kekenamsil’ tenen, Allah el si erena ati, kam ning obuka arina ap, nintong teleb ning dobuka, uku dongona ap, ulamika atonun, Kristus arye nun ti, bico tenebuka kanye talima aripsukce, elcuk el bidamnye nong, Allah ati aribukce, nun yok pununa ati dibuk ura, Allah arye, kanye deibuk. Yesus arye, kanye talima aripsukce, bico tenesilye touk, anggunce yuk ninye nirya ati, bico tenebuka melilana uk unamlulume.

³Ara, anggunda, Allah arye, wipdeipsuk ura, el mapu akunum ululuma ati, anggun kan-kan noutamak ara, talye yolana ap, malye-malye winin ning yala-yala nirya ap, ‘Aning-aning nirya, weik arye, dobuka taliptinye’ tenen, kanye talima fum tam ‘Se,’ tenena ap, anirya ara, mitikto babye fia kum unamlulume. Allah arye, ‘Na ninye, fia pung diksukum nanguk unamak’ tenen, wibuka delilul ninye ara, ato malye winin ning fia kum wininyaka anya arye, anggun babye, amalye ning nirya kum wininamlulume. Kum winipmunyop ura, yuk nang arye, anggun Efesus mutuku ululum ninye ati, ‘Sikda winibuka, winibuka malye wininyak’ tenen, kum nyapsitinge.

⁴Aning atonun, Allah el mapu ara, diksukum un ninye unyaka anya arye, anyapnusin ning ara, anggun babye, fia kum wininamlulume. Ara, yupu si dabuka derelamunce, ninye wan yupu ap, talye-talye yupu nyaplobikirye, yebyeban yupu ap, ‘Yuk nang akutupnamak’ tenen, talye kwalinyak yupu ap, teleb nang kum winipnamting ning yupu talina ap, aniryra ara, fia kum nyanamlulum bukni, teleb ning ara, Allah atibuk, “Nun ni telebe,” nyabuka fia nyanamlulume.

⁵Amalye winin ning nirya, “Kum wininamlume,” nyapmasina ara, urdem ati kum nyapsine. Fia dipkoprop tenenamlulume. Anggun talye yolana ap, malye-malye winin ning yala-yala nirya ap, ‘Aning-aning nirya, weik arye, taliptinye’ tenen, kanye talima fum tam ‘Se,’ tenena uk, unyak ninye ara, Allah ap, Kristus ap, neika kum uptinge. Ara, Allah ap, Yesus ap lyepsirikiry, nun talima talisirikceba, fia teleb kibuka unamabak ara, amalye winin ning wininyak ninye tonok babye, ansinibuka kum unamabe. Allah arye, amalye wininyak ninye dobuka, fia yukak deipliba, talye uk unamake. ‘Aning-aning nirya weik arye doproptinye’ tenen, mun tululul nang ara, ‘Dip’ tenena, kum nang arye, ‘Nun ni koprop’ tenen, talye ning ap, Isa Mutuku Dongonye si erelamak nang atonun unyake. Aunyak ninye babye, Allah arye, arinamsil ning dobuka, el ap, neika kum unamake.

⁶Na kayapu, talye nang arye, talye-talye yupu, nong kum upnamle yupu talye nyaplobikiba, ‘Mankau arye, tilila ning dib tenebityak’ tenen, anggun kanye moupnamlulume. Talye ati kum nyapsine. Amalye nyapmasin ning nirya wininyak ninye arye, Allah el yupu yaniplobuka, wininyaka ati ara, Allah yu weik upliba, sik nong deice ikin ning weik deipliry, weika arye, wenelule. ⁷Ati, amalye wininyak ninye atonun ninye nirya ap, anggun ap, ansinibuka una meme. Sikce malye wininyak ning yala-yala nirya ara, anggun Yesus ati dib tenelulum ninye arye, fia kum wininamlulume.

⁸Sik malye wininyak ninye ap, ansinibuka una meme nyapmasina deiyok ara, ani. Minop talak ara, anggun Efesus mutuku ululum nang ara, fia malye-malye ulamluma deice arye, kunuknak atonun ninye ulamlum bukni, winitalak ara, nun Deiyoknye Yesus ap, talima dukdongobuka umunya deice arye, dirina ninye atonun akunum ululume. Ati Dirina Deiyoknye arye el mapu una ati, akunum teleb kipdeipsuka ati, dirina nang ulamak atonun diksukumuk unamlulume.

⁹Deiyok ara, ani. Duk moulamle yo arye, el yo yala ulye touk duk moulule. Duk moulamle atonun, diksukum winina ati dirina usilibuk, duk moulamsil ning ara, nyapnusine. Ara, teleb winin ning yala nirya ap, Allah ara, malye ning tonok ning babye, kum uliry, pung ulye touk, diksukum winin ning nirya ap, tilila nyana kum aniryuk, dipkoprop yupu uk nyana ap ara, aning-aning nirya ara, dirina ning ulule. Teleb yo arye,

teleb duk moulamle atonun, anggunda dirina atonun ninye ululuma anya arye, ateleb winin ninguk wininamlulume.

¹⁰Tonda, anggun niry a arye, ‘Se, nun yata wiriptibyeba, Allah el kanye deipnamsil do?’ tenen, fia piribuka kel biknin banamlulume.

¹¹Malye yo arye, malye yo duk moulamle atonun, sik malye wininyak ninye, sik talima kunukna deice arye, nong kum upnamle ning, malye ninguk wininyake. Sik wininyak ning niry a ati ara, fia memepdopmunce, aning kum wininamlulume. Talye kanye bobuka, aninye ap, ansinibuka una kum bukni, sik malye wininyak ning ati, laka deice arye, yupu nyapmunce, batakanamlulume. Ara, yuk nang niry a ara, moubuka kel kiptingce, ‘Amalye winin ning bataknamak’ tenen, anggunce, “Kume, sik malye winin ninye ara, kunuknak atonun malye wininyak ning ara ani-ani,” nyabuka, laka arye, laka nyapmunce, yupu sekelongonamlulume.

¹²Sik ti, yupu sekenamluma deiyok ara, ani. Ara, sik fia malye winikirye, Allah yaninyak ninye arye, yuk nang kum elinyak ak, dungnubuka wininyak ning ara, fia malye anya arye, nun teleb nang arye, yupu deice uk laka nyabibyop ura, alye upsute. ¹³Yata ning do niry a, kunuknak arye dobuka, dirinak deibibyop ura, laka kipliba, ninye niry a arye, “E, aning ara, winibuka ulule. Malye ning ani, teleb ning ani,” tenebikirye, moubuka kel bikinyake. ¹⁴Yata ning do niry a, dirina arye aning deice deipliba, lakak uk ulule. Laka upliba, moubuka kel biktibirye, ‘Aning teleb ning, aning ara, malye ning’ tenen, bikinyabe. Aning ati ara, ayupu ton nyanyabe.

“Amio, an diplumnye bira kam buklyame. Kristus el dirina arye, teleb kipdeipnamkile.”

¹⁵Aning-aning niry a ati ara, anggun Efesus mutuku ninye ara, walwal unyak nang atonun talye mankau kanye bobuka kum unamlume. Anggunda, ‘Walwal arye, malye winibibiyak’ tenen, fia kanye moubuka umunce, weik kel nang arye, winilamak touk diksukumuk wininamlume. ¹⁶Winibuka telebuk umunye talak noutamak niry a ara, ‘Lo talak ton kum upsiliba, teleb fil kum doptibnye ati, lo tuba awapsilye talak ara, fia pi dobuka telebuk wininamap’ tenen, fia moubuka telebuk wininamlume. Winitalak ara, malye-malye winin ning ap, malye wininyak ninye ap, weik aupmale ati, “Anggun kanye moupnamlulume,” nyapmasine.

¹⁷Aning ati ara, kanye bona kumce, talye kanye bobuka walwal arye, kum wininamlum bukni, nun Deiyoknye birye, ‘Wininamake,’ tenesilye touk, aning uk moubuka kel biknin banamlume. Walwal asa arye, malye kum wininamlum ning ton nyapnusine. ¹⁸Ara, kanye wangalamak mek dibikcop ura, sik kanye wangabikiba, talye yolana ap, malye-malye winina ap, wininyaka anya arye, mek dibibyeba, kanye wangapsiliba malye winina ara, meme. Aning kum wininamlum bukni, Allah El Dib Kanye aripsukbuk, nun kanye talima wekuka usilinye birye, ‘Allah

El Dib Kanye arye, nun kanye talima talisilye deice arye, el mikip kipdeipnamsile' tenen, el amutamuk unamlulume.

¹⁹Anggun nirya arye, anggun ap, neika ululum nang ati, mot sebuka, kanye talima kwa dilanamlulume. Ara, Mazmur Allah yupu deice sekeipsuk ning ap, 'Allah el si erepnuyap' tenen, anggun kanye aryuk mot sekuka nyamunye ning ap, Allah arye, anggun talima noutam, 'Winibuka nyanamlulume,' nyabuka laka nyasiliba, mot nyamunye ning ap, amot yala-yala nirya nyanamlulume. Amot-amot nirya nyanamlum talak ara, anggun kanye talima noutamak arye, Allah el si erepmunce, el ti kibuka si erenamlulume. ²⁰Winibuka wininamlum talak nirya ara, nun Deiyoknye Yesus, el si deice arye, nun Ni Kopropa Allah ati, "Aning-aning awapsilye ning nirya ara, telebe," nyabuka, Allah el si fia erenamlume.

Sal ap, kilapu ap, dopdakirye, neika unamake ati nyabuk yupu

²¹Tonda, anggunce Kristus ati, 'Elda mambule, nun Deiyoknye usulule' tenen, winimunya deice arye, anggun ap, neika umunye ninye ati ara, sik amutam bukuka nimalye arye, unamlume. Kanye talima kum ereldanamlulume.

²²Anggun kilapu nirya arye, anggun akanye yapu ati, sik amutam bukmunce, sik yupu kekebuka nimalye arye, unamlulume. Winibuka unamlum talak ara, 'E ara, nun Deiyoknye Yesus, el si erena ati, el amutam bukibirye, el yupu kekenyapa atonun, nun akanye yapu sik amutam bukuka unyabe,' tenenamlulume. ²³Wininamluma deiyok ara, ani. Ara, Kristus arye, nun ti lyepsukce, el ti dib tenenyap ninye nirya ara, dukdongopsukba, el nong atonun unyaba anya arye, nun kisok atonun ululnye ara, el Kristus uka. Elda, nun lyena ati, Lyena Deiyoknye^b usulule. Aning atonun, anggun kilapu nirya, anggun akanye yapu ara, anggun deiyok nang unyake. ²⁴Nun dib tenenyap ninye nirya arye, nun Deiyoknye Kristus ati, el amutam bukuka, el yupu moubuka kekebibirye, elce nyasilye yupu kekebuka, nimalye arye, ulamapa atonun, yata winin ning do nirya, aning-aning nirya ati, anggun kilapu nirya ara, anggun akanye yapu ati atonunuk, adip aryuk sik amutam bukmunce, sik yupu kekebuka, nimalye arye, unamlume.

²⁵Ara, anggun sal ati, ayupu nyapnusine. Ara, Kristus arye, el ti dib tenebupu ninye ati, fia bico tenebuka talima aripsukce, nun ti lyepsuk atonun, anggun sal babye, anggun domunye kilapu ati kanye talima aripsilyop ura, bico tenebuka fia telebuk unamlume. ²⁶Kristus arye, el

^b 5:23 *Lyena Deiyoknye* Alkitab noutamak ara, Lyena Deiyoknye sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. arye Yesus ati sekuk. Paulus arye Yesus tenena ati sekuk. Tonda, laka nyana yupu nomor 17 dipdelelume.

ti dib tenebupu ninye ati, dibukce lyepsuka deiyok ara, nyapnusine. Ara, elce uteneamsuke. ‘Anang ara, na mapu unamak’ tenen, na laka teleb yupu deice arye, sik malye winin ning kum danalina ati, aninye ara, mek likina atonun kipdeipnirye, sik malye winin ning nirya kilipnirye, kum daneipnyop ura, aninye fia teleb kipdeipniba, ‘Na mapu dipkoprop unamake,’ tenepsukce dibuke.

²⁷Yesus Kristus arye, winipsuka deiyok ara, ani. Aning tenebuk. ‘Sik malye winin ning nirya kum kipdeipniba, malye ning tonok ning babye kum upliba, na ti dib tenenamniyak ninye ara, fia diksukumuk unamak ninye kipdeipnirye, na tenen ninye una ati, aninye dobuka deipnamne’ tenen, Yesus Kristus teneamsukce winipsuke. Ara, Yesus arye, nun ti, ‘Na ti dib tenenyak ninye ara, malye ning tonok ning babye, kum upliba, fia diksukumuk unamak’ tenen, lyepsukce, teleb kipdeipsuke.

²⁸Aning atonun, anggun sal nirya arye, anggun bidamang nong ati, kanye deibuka teleb ulilamlum atonun, anggunce anggun dolalum kilapu ati, adip aryuk talima aripsilibuk, bico tenebuka, milina uk unamlume. Yatanye do nirya, elce domlye kil ati, bico tenebuka milina uk ululnye bira, awinilya deice arye, elcuk, el bidamnye ati melilanamle. ²⁹Anggun kele. Ninye mutuku-mutuku nirya sik bidamnye nong ati, ‘Na lik’ tenen, malye kum ulilanyake. Aning kum bukni, din dibuka, telebuk ulilanyake. Ati, anggun sal arye, anggun dopromunye kilapu ati, bico tenebuka teleb kibuka melinamlume. Aning atonun, nun dib tenenyap ninye ara, nun patapsilye ning nirya ara, Kristus arye, melibuka aresulule. ³⁰Nun nirya ara, yuk-yuk unyap bukni, Kristus arye, kanye talima dukdongopsukce, el tonok nong atonun kipdeipsuka anya arye, nun patapsilye ning ara, melibuka aresulule. ³¹Allah yupu noutamak ara, sal ap, kilapu ap, dolana ati, ayupu ton sekdeibik. Ayupu ara, ani.

“Yatanye do nirya, el li kopropa ap, el lin kopropa ap, batakuka, el kil doplyop ura, sik bitinye ara, nong tonok atonun kibuka, kanye talima deipdarikirye, neika uk unamrake,” Allah arye, nyabuk. (*Kejadian 2:24*)

³²Ayupu ara, sal arye, kil donamak ning ati, sekdeipsuk bukni, ayupu noutamak ara, ‘Nong tonok atonun unamdake,’ nyabuka sekdeipsuk ning ara, ikin aniryuk kel kiptibye. Ayupu deiyok ara, weik kel kiptibya deice arye moubuka kekeptibye. Ayupu nyasilye touk, na Paulus birye, ayupu deice arye, nun dib tenena ninye ati, nyapsine. Ara, ‘Kristus ap, el ti dib tenebice ninye ap, kanye talima dukdongobuka, nong tonok atonun unamake’ tenen, Allah arye, nyapdeipsuke. ³³Ayupu deiyok noutamak ning ara, bitinye upsil bukni, dipkoprop nyapsine. Anggun sal nirya ara, anggun babye anggun bidamnye ati kanye deibuka teleb ulildalamlum atonun, anggun domunye kilapu ati, fia bico tenebuka milina uk unamlulume. Tonda, anggun kilapu nirya arye, anggun akanye yapu ati, kipmunce, sik yupu kekebuka namin asa arye, neika unamlulume.

Anggun mapu nirya, anggun ni yapu ap, anggun nin yapu ap ati, “Wininamlulume,” nyapdeibuk yupu

6 ¹Anggun mapu nirya ara, nun Deiyoknye Yesus ap, kanye talima dukdongobuka neika umunye talak noutamak nirya ara, anggun ni yapu ap, anggun nin yapu ap ati, si erebuka sik yupu moubuka kekepmunce dobolbanlulume. Aning ara, diksukum winina ati, ‘Anggun ton wininamlulume,’ nyapdeipsine. ²⁻³Allah arye, nyapsuke.

‘Allah arye, “Anggun mapu nirya ara, anggun ni yapu ap, anggun nin yapu ap ati, kipmunce sik yupu kekenamlulume. Winibuka umunye ura, Allah melipsilirye, mikip aripsilyop ura, kiting tamun weik arye, tonap kam unamlume. Tonda, aning-aning nirya telebuk wininamsile. Anggun ni yapu ap, anggun nin yapu sik yupu kum kekepmunyop ura, aning kum wininamsile,” Allah arye, nyabuk.’ (Ulangan 5:16)

Ara, Allah arye, ninye ati, “Wininamlume,” nyapdeiyamak yupu weik aupmal bukni, wini nyapmasin yupu deice ara, deiyok koubuka, “Winipmunyop ura, na arye teleb kipdeipnamsine,” nyabuka, minyuma ning nyapdeiyamsuke.

⁴Tonda, anggun ninye wisi ati ayupu nyapnusine. Anggunce anggun mapu ati, weik arye, wenebuka derepmunyop ura, anggun mapu ara, ‘Se’ tenen, kanye imun kanye bobuka, talima sukulule. Ati, anggun mapu ati, yu upsiliba mikip arye, wenena meme nyapsine. Aning kum bukni, nun Deiyoknye Yesus arye, ‘Wininamake,’ tenesilye touk, anggunce el yupu dobuka, anggun mapu nebice talak nirya ara, “Aning wininamlulume, aning ara, kum wininamlume,” nyabuka, namin asa aryuk peterenamlume.

Fil melin nang ap, fil deiyok nang ap, ati nyabuk yupu

⁵Sik yo bok deice deksikiba, talye ati fil domunye nang ara,^c anggun deiyok nang arye, nyasice yupu ara, moubuka kekepmunce, ‘Nun deiyok nang ara, fia mambule’ tenen, si erebuka unamlume. Aning nirya ara, tenepce winina kum bukni, anggun kanye talima

^c 6:5 yo bok arye, *dekenyak ninye* – Aning ara, sik minop talak winilamik. Sisin nang arye, yo bok deice arye, fia bona utotowa talina kum ninye deklamik. Akunum dekna arye, bona utoto talina kum ninye ati, ‘Nun fil talye dopsilyame,’ nyapnop ura, anang arye, dekna ning dolona kum aryuk, talye fil dona uk ulamik. Atalak ara, talye bona dekmabye touk, sikda, ‘Nun ikin fil donamsiyak’ tenen, bona utotowa talina kum ninye ton deklamik. Tonda, lak len yupu nomor 36 dipdelelume.

diksukum ubuka telebuk wininamlulume. Ara, ‘Kristus nyapsutuba, el yupu kekebuka dobolbana atonun winipnuyabe’ tenen, anggun deiyok nang arye, nyasice yupu ara, kekebuka teleb ubuka wininamlulume.

⁶Aning ara, ‘Nun deiyok nang arye, eipsikce talak uk, sik yupu kekebibirye, teleb ubuka fil donamap bukni, kum disice talak ara, bataknamabe,’ tenena kume. Ara, ‘Talima arye, fil teleb ubuka kum donamap bukni, nun deiyok nang arye, disice talak kanye deipnamsitinge,’ tenena kume. Aning kum bukni, anggun deiyok nang arye, disice talak babye, kum disice talak babye, telebuk fil donamlulume. Ara, anggun fil don talak nirya ara, utenenamlulume. Ara, ‘Allah arye, tenelul touk, tenepce tilila arye, winina kum bukni, dipkoprop telebuk unamne. Kristus el fil melinanye atonun unamne’ tenen, anggun deiyok nang arye, nyasice fil, teleb kibuka donamlulume.

⁷Yata fil do nirya, fil donamlum talak ara, kanye bokoltona kumce, utenenamlulume. ‘Kume, na arye talye ninye ati, sik fil kum donune. Na ara, nun Deiyoknye Yesus, el fil ati donamne’ tenen, anggun deiyok nang arye, arukusinyak fil nirya ati, fia pi dobuka, teleb ubuka donamlulume. Ara, ‘Na Deiyoknye Yesus el si erena ati, afil donune,’ tenenamlulume.

⁸Winibuka tenepmunce, fil teleb ubuka donamluma deiyok ara, nyapnusine. Ara, anggun kele, yatanye do nirya, fil teleb ubuka doplyop ura, nun Deiyoknye Yesus arye, anye bira el fil dobuk ning ati, dekna ning aripnamle. Ara, yo bok deice arye, dekikce ura, urdem ati, fil don nang babye, sik kanye aryuk fil donyak nang babye atonun, fil donyaka dekna ati, fil dolamaka atonun, Yesus arye, dekna ning aripnamsile.

⁹Ara, anggun fil deiyok nang ati ara, ayupu nyapnusine. Arup ara, anggun fil melin nang ati, “Winipnamlulume,” nyabuka sekmasin touk, anggun deiyok nang arye sik amutam unyakceba, anggun fil melibuka donyak ninye ati, teleb ubuka neika unamlulume. Anggun melin nang ati, ‘lil upnul’ tenen, “Amapo, na nyapmasin touk, fil kum dopnumunyop ura, ikin ning anggun nong deice winibuka deipnamsine,” nyabuka, wenena kume.

Ayupu ara, talye kum nyapsine. Ara, anggun kele, anggun amutam talye fil melin nang ap, anggun deice tam fil deiyok nang ululum ninye ap, anggun Weik Deiyoknye bira tonokuka. Elda im deice ulirye, tukwak mutuku ninye nirya dipdebuka, yupu bokeipnamsil ning ara, ansinibuka unamsile. ‘E anang ara, na kayapu nang ati kum wenepnamne’ tenen, kanye kum wilisulule. Weik nang babye, mitik nang babye atonun tenepsilirye, nun winilamap atonun dekna arinamsile. ‘Ton nang ara mambule, ton nang ara, mambul kume,’ kum tenesulule. Nun winilamap atonun yupu lepsisikuka bokolisulule.

Isa Mutuku Dongonye ap, isa mer ap arye, ‘Na mapu malye updeipsicak’ tenen, Allah el mikip deice arye, arisilye ning ati, nyabuk yupu

¹⁰Winira na kayapu, asurat sirya dakna ati, yuk yupu ton nyapnusine. Anggun ap, nun Deiyoknye Yesus ap, talima dukdongobuka neiktoto

unamlum talak noutamak arye, el mikip weik arisilya deice arye, lamapdongobuka mikip arye, unamlulume. Mikip unamlum ning ara, Allah el mikip deice aryuka. ¹¹Sik yin talin nang arye, kat ning dobuka ongobikirye, olalbalamak touk, Allah arye, mikip kilin ning arisilye ning nirya dobuka unamlulume. Tonok ning babye, batakana meme. Winipmunyop ura, Isa Mutuku Dongonye arye, tenepce tilila yupu ap, malye-malye winilisilye ning deice arye, ‘Malye winipting’ tenen, kikipdesutu babye, mikip arye, lamapdongobuka unamlulume. Malye kum wininamlulume.

¹²Aning ara, talye kum nyapsine. Nun nong deice ikin ning deipsikirye, nun kanye talima malye kilina ati, usulula deiyok ning ara, ninye arye, kume. Tonda, nun ti opmanto usulul ning ara, ninye arye, kume. Aning kum bukni, malye ulul ning nirya talibuka, deice tam mikip ulya deiyoknye Isa Mutuku Dongonye ap, tonda Isa Mutuku Dongonye el amutam unyak bukni, im ap, tukwak ap, im sirya mutuku sirya bokuka, talilya deiyok isa mer ap, fia malye tukwak kunuknak mutuku noutamak mikip ulul isa mer ap, asing kum elinyap bukni, im noutamak unyak isa mer ara aning-aning nirya ap, aisa mer nirya arye, nun dib tenenyap ninye ati, ‘Malye kibuka, optibye’ tenen, yaniltasinyake. Ati, winipsikiba, ikin weik usilye ning deiyok ara, ninye arye kume, ara Isa Mutuku Dongonye aryuka.

¹³Aning ati ara, ‘Isa Mutuku Dongonye arye, anggun kanye talima malye kipdeipsilye ura, malye ubibyak’ tenen, Allah arye, nun kanye talima mikip kilina ati, arisilye ning nirya ara, dolonamlulume. Tonok ning babye, batakana kume. Ara, yin talin nang arye, ‘Ninye oldan talak arye opsicak’ tenen, sik nong deice kat ning ongolamaka atonun, Allah arye, nun kanye talima mikip kilina ati, arisilye ning dopropmunce, kintinilinamlulume. Aning nirya dobuka kintinipdeiptum ura, dan talak arye do nirya, malye ning yalirye, kiklilesilya babye, lilil kumce, fia lamapdongobuka, mikip arye, unamlulume. Kintinina kumop ura, mikip kum uptume. Malye ning arye, malye kibuka bisipsilyop ura, malye winipra banamlume.

¹⁴‘Winipsilyak’ tenen ati, fia kintinibuka kanye tonok tenebuka mikip arye, unamlume. Allah arye, aripsiliba, ongonamlum ning ara, ani. Ara, yin talin nang deiyatinga delilamak atonun, Allah el dipkoprop yupu kekepmunce, moubuka talinamlume. Allah el yupu ara, anggun deiating atonun upnamsile. Tonda, yin talin nang arye, taram deice ting kiniklamak atonun, Allah el diksukum ulye touk, nun ti, ‘Diksukum ninye unamak’ tenen, teleb kipdeipsilyop ura, anggun babye, diksukumuk unamlume. Diksukumuk una ara, anggun taram deice ting kiniklamak atonun upra banamlulume. ¹⁵Yin talin nang arye, sik yan deice kat sepatu ongolamak atonun, Allah el laka teleb yupu, ninye lyena

ati, el teleb yupu kel kimunya deice arye, kintinipdeipnamlulume. El laka teleb yupu kekebibya deice arye, el ap, ansinipdeipsiliba, kanye deibuka unyabe. El laka teleb yupu ara, sik yan deice ongolamak ning, kat sepatu atonun upnamsile.

¹⁶ Aning-aning nirya kweirya dobuka kintinipmunyop ura, yin talin nang ara, ‘Mal arye opsicak’ tenen, kelapye dobuka, sik urasin tam talibuka balamak touk, fia mikip arye, Allah ati dib tenenammlume. Isa Mutuku Dongonye arye, nun ti, ‘Sik kanye malye kipdeipnye ura, malye unamak’ tenen, kiklildesilye ning ara, uku mal dopna arye, dolamak touk ulule. Anggunce Allah ati, dib tenepmunya deice arye, Isa Mutuku Dongonye el uku mal tangapmunce, kiklilden ning nirya, obisiptume. Ati, anggunce Allah ati mikip arye, dib tenenammlum ning, ara anggun kelapye atonun upnamsile.

¹⁷ Yin talin nang arye, ‘Nun kisok copsicak’ tenen, kat topi kalulamak atonun, anggun kanye tenen ning kalekna ati, Allah arye, akunum lyesilya ara, fia tenena uk unamlulume. Tonda, Allah El Dib Kanye el parang ya atonun ning, Allah el yupu ara, moubuka kel kipmunce, talibuka unamlulume. Anggun kisok kaluna atonun ning ara, Allah arye, lyesulule tenena atia. Anggun parang ya atonun ning ara, Allah el dipkoprop yupu atia.

¹⁸ Aning nirya bobuka, unamlum talak noutamak nirya ara, Allah El Dib Kanye arye, anggun kanye talima talisilirye, el mikip deice nyasilye touk, Allah morona ap, aning-aning nirya ap, anggun patan ning ati, Allah morona ap, fia wininamlulume. Ati, ‘Allah El Dib Kanye mikip arisilya deice arye, Allah moronamabe’ tenena, uk umunce, talye kanye bobuka, lik una kum aryuk unamlulume. Tonda, batakana kum, fia pi dobuka, Allah ati fia moronamlume. Allah moronamluma ara, ani. Ara, ‘Allah arye wibuka, el mapu kipdeipsuk nang nirya ati, Allah arye melinamsile’ tenen, anggunce Allah moronamlume.

¹⁹ Tonda na kayapu, na ti Allah moronamnulume. Ara, ‘Paulus bira yupu nyanamle talak nirya ara, Allah arye, teleb yupu aripliba, teleb kibuka peterenamle’ tenen, Allah moronamnulume. Tonda, Paulus birye, ‘Ayupu ati derepnamniyak do?’ tenen, ‘Ilil kumce, mikip asa ubuka, Allah el laka teleb yupu, teleb kibuka petereptue’ tenen, anggunce na ti Allah moronamnulume. Allah arye, el laka teleb yupu deiyoknye bira, minop talak duknyamuk bukni, winitalak akunum laka kipdeipsuk ati peterenyabe. ²⁰ Na Paulus birye, ayupu dobuka peterelbalamsa ati ara, yu nang arye, ‘Ayupu ara, nun lik’ tenen, tomopnikce, tapu koubuka wenena aik dongopnik ura, asukum uk tuba unune. Aunun bukni, ayupu laka peterena deiyoknye tuba unune. Dipkoprop teleb ning ara, anggunce, ‘Paulus bira, ilil fia kum aryuk, mikip kibuka, mikip arye peterenamle,’ tenen, Allah moronamnulume.

Asurat sirya dakna ati, nyabuk yupu

²¹Ara, na kayapu, nun weit atonunye Tikikus, nun Deiyoknye Yesus ap, kanye talima dukdongobuka ulirye, batakana kum, fia pi dobuka Yesus ati fil dolule. Tikikus birye, na wininye ning ap, imun unulul ning ap, nirya ara, anggun kekena ati, anggun dam yalirye, laka nyapsiliba kekepmunyop ura, na unye ning nirya kel biknamlume. ²²Na arye, Tikikus dobuka, anggun dam dopdeipne ning deiyok ara, aning uka. Yuk ton kume. Elce anggun Efesus mutuku ululum ninye ati, nun winisilye ning ap, nun unyap ning ap, laka nyapsiliba kekepsunumnye ura, 'Aning deice arye, anggun kanye talima mikip kipdeipnamsile' tenen, anggun dam dopdeipsine. ²³Telebe, sik dib tenebik ati, nun weit yapu atonun ninye nirya ati, Allah moronun ning ara nyapnusine.

Ara, 'Nun Ni Koprop Allah ap, nun Deiyoknye Yesus Kristus ap, sik bitinye arye, anggun nirya ati, mambul ning arinamsirak' tenen, Allah morosunune. Arinamsirak ning ara, ani. Ara, yuk nang ap, kanye deibuka, nimalye arye neiktoto una deiyok ning ap, yuk nang ati bico tenebuka melildana deiyok ning ap, Allah ati weik arye dib tenena deiyok ning ap, 'Adeiyok ning nirya aripsirikce ura fia telebuk unamak' tenen, na arye anggun ti Allah morosunune. ²⁴Tonda, yata mutuku ninye do nirya, nun Deiyoknye Yesus Kristus ati, sik kanye el deice uk deibuka, el uk talibuka unyakce, fia kum batakanyak ninye ati ara, Allah moronun ning nyapnusine. Ara, 'Allah bico tenesilirye, el kanye aniryuk talye arisilye ning, weik arye, aripsilirye teleb kipdeipnamsil' tenen, Allah morosunune.

Telebe akunum nyapsine.

Na Paulus birye, asukum uk deipsine.